

錢海岳撰

南明史

第十一冊



局

錢海岳撰

南明史

第十十册
列傳
卷八十四至卷九十

中華書局

南明史卷八十四

列傳第六十

無錫錢海岳撰

林蘭友 從子 吳 盧若騰 弟若驥 族弟若驥 鄭以佳 盧灝 林汝騫 魏憲 陳家麟 林夢龍

陳世亨 林塗 子鍾爵等 鄧良藩 張士燦等 葉子器 郭文寬等 林之蕃 李士彥 王來聘 張

寂惺 湯芬 周之夔 趙最 彭遇颺 胡允貢 盛于唐 王期昇 吳景夏等 郭符甲 子喬

柱等 顏昌儒等 諸葛斌 郭顯 李甲 朱甲 林峴 兄簡等 都廷諫 毛端 林逢經 弟逢平

林尊賓 林說等 梁鼎鍾等 黃同 王恩及 弟恩鴻 陳大年 黃贊朱 鄔正畿 弟正薊等 陳

紹顏 王翊 弟翊 沈調倫 黃中道 蔣士銓 石必正等 馮京第 邵一梓等 張元 張文熊 王

江 趙立言等 鄭溱 張夢錫 董志寧 子士駿等 朱養時 吳明中 鄭遵儉 郭定等 李國楨

李開國 梁隆吉 林琰 楊思任 江用楫 董玄 劉午陽 朱萬年 顧珍 王璽 顧宗堯 顧玠 陳

所學 曹威鳳等 陳駒 周在德 韓允祥等 江中汜 劉孟賢 張鵬翼 曹肅 曾應選 戴仲明 章有

期 顧明楫 朱錫齡 林世英等

林蘭友，字翰荃，仙遊人。崇禎四年進士。授臨桂知縣，宗室貴戚爲斂跡。遷湖廣道御史，連疏劾輔臣張至發、薛國觀，冢臣田維嘉，樞臣楊嗣昌負國之罪。忤旨，禍且不測。黃道周、劉同升、趙士春、何楷交章論救，謫浙江按察炤磨。時稱「長安五諫」。久之，起光祿丞、考功員外郎。

李自成入北京，纍繫羣臣，令降者立紅幟下，不降者立青幟下，蘭友竟立青幟下，遂暴烈日中。有道士投以濡帕，嚙之得不死。

紹宗即位，起太僕少卿，兼山西道御史巡按江西。上曰：「卿此行，須顯破情面，明樹擔當，大展忠猷，令人指目。如此行事，方是中興之驄馬；如此激揚，方是天子之法臣。卿爲朕親簡之人。卿之不善，即朕不明；卿之有爲，亦朕善用。江民憔悴於貪政久矣，切切以朕『先教後刑，先情後法』八字行之。又八字曰：『小貪必杖，大貪必殺。』真能代朕行此十六字，始不負人君耳目之寄。」蘭友之任，招集流亡，勵以忠義，衆皆感奮。擢僉都御史。

福京亡，歸倡義兵，練卒措餉。監國魯王入閩，迭晉兵部右侍郎、尚書，兼副都御史，總理恢剿軍務糧餉，督師泉、漳，與林尊賓犄角。踰年，力不支，乃奉親思明，羈窮飄泊，凡十

五年乃卒。遺命墓碑書「罪臣」，勿具官銜。

從子吳，字孟吳，博極羣書。入清不應試。蘭友歿，有問及者，輒流涕云。

盧若騰，字閑之，同安人。崇禎十三年進士，授武庫主事。時楊嗣昌督師湖廣，好佞佛，請刊布華嚴經祈福。若騰疏劾之，被旨切責。尋遷郎中，兼總京衛武學。三上疏劾定西侯蔣惟祿。出爲寧紹僉事，轉參議。權奄田國興攬帶貨舟，濫用人夫，辱州縣，阻閘口。力糾其罪，上召國興回，論如法。諸豪奴詐取民財，捕至庭下，重笞之。一奴著綾袴，加笞焉。時天下已亂，若騰練兵無虛日。奉化山寇胡乘龍竊發，與寧波知府陸自嶽設方畧平之。

弘光時，以僉都御史督理江北屯田，巡撫廬鳳。未行而南京亡，紹宗命改浙東。時監國魯王已命孫嘉績、于穎矣，上又命若騰，於是浙東遂有三巡撫。若騰至溫州，以事權不一，請專責成。上乃命以兵部右侍郎、副都御史巡撫溫處台寧，恢討浙西，而台寧又歸魯王節制，所撫者溫處而已。已又命楊文驄就處州。若騰疏言：「兩郡制以二撫，是謂十羊九牧。且撫多則標員隨役必多，糜餉不資，無當戰守之用。請裁併歸一，責成文驄。」上命黃鳴俊酌議去留。而鳴俊以若騰無過，難以議撤。踰年正月，再疏請，不許。

時劉孔昭交構閩、浙間，若騰疏言：「今日之用孔昭，非謂世臣足以繫屬人心，謂恐其歸向魯王耳，臣愚以爲此舉大誤。夫孔昭身爲操江大臣，事急鼠竄，得陛下便宜行事之旨，飛揚跋扈，旬月間有衆數千，且請臣與文驄專理餉，而兵專歸之。彼此其心，不過欲據溫處爲郿塢畢老計耳。」已而郭貞一亦交章劾之，遂削孔昭便宜行事。孔昭因怨望，日與文驄爭括餉田，率兵向溫。若騰與賀君堯、沈有茲、徐柏齡禦之。擢尚書督師，賜「無不敬」三字。時顧錫疇寓江心寺，爲君堯所害，若騰以聞，爲請卹。

六月，江上潰，魯王走台。七月，清兵攻溫，督君堯巷戰，腰臂中矢，力竭入海。至鎮下關，上疏自劾。

汀州變聞，投水，爲人救免。乃之長泰，與傅象晉、郭大河起兵，所謂望山之師也。以食盡瓦解，遂依魯王海上。命以原官督師。鄭彩殺熊汝霖，衆莫敢言，獨揭聲其罪，朝野悚然。

永曆二年，路振飛疏薦，昭宗以故官召，道阻未赴。十一月，與丘建曾、曾平和、萬禮及楊學皋、漳浦、佛潭橋，進新亭寨，斬總兵楊佐、參將陸大勳。建曾死，從扈舟山，間詣大蘭山寨，入張煌言軍。父老壺漿上謁，垂涕遣之。

舟山陷，奉疏昭宗，偕貞一、王忠孝依鄭成功、思明，成功待以上賓。成功卒，煌言遺書

若騰，謀復奉王。若騰謀於閩南遺臣，秣馬以待，會王薨不果，遂遯跡澎湖。十八年三月，疾革，大呼先皇帝而卒，年六十六。

弟若驥，總兵。

族弟若驥，三山福寧裨將，遷遊擊，守盤山關年餘。清兵自紹興攻關，堅壁勿戰。清兵大至，乏食，議開關一決，副總兵周茂中矢死。兵敗入關，諸將見援絕請降。若驥於夜半以兵三百自溫州歸舟山，後從成功軍。永曆六年，以恢撫閩浙，與黃興畧詔安九甲，破清兵平和。七年，坐擅歸罷。

鄭以佳，不知何許人。諸生。長樂知縣，被劾。王以其清苦，降級消息之，旋爲湔雪。終事不詳。

盧瀾，字迴狂，龍溪人。工詩。依若騰卒。

林汝翥，字大葦，福清人。萬曆三十四年舉於鄉，授沛縣知縣。天啟中，戰卻徐鴻儒兵，緝妖人王普光黨有功，遷四川道御史巡視京城。

時魏忠賢亂政，楊漣劾之，有旨切責。汝翥繼上疏，請遠稽漢唐覆車之鑑，杜他時孤立之衅，立斥忠賢於外。疏上留中。會有民曹大妻與富家奴角口，服毒死，內奄曹進、傅國興

以衆掠富家，用大錐刺其主，刑官不問。汝翥捕得進，進懼劾，請受杖，杖之五十。國興怒，邀汝翥於道，罵不已，復杖之如進。忠賢聞之，大恚，立矯旨收汝翥廷杖。先數日，羣奄毆殺萬燦，汝翥懼，乃逸遵化。巡撫鄧漢、都御史孫璋、御史潘雲翼交章論救，不得解，卒杖之，削籍歸。一時強項之名大著。

崇禎末，起瓊州副使。坐奸民扇亂，貶秩。安宗立，調臨沅。紹宗即位，擢廣東右布政使、太嘗卿。未赴而福京亡。永曆元年七月，監國魯王至長垣，郡邑起兵應之，召爲兵部右侍郎總督義師，以魏憲爲監軍御史。與族人塗復福清。後汝翥敗，觀音埔被執，誘降不屈，繫之。一夕，服金屑死。

憲，字惟度，福清人。諸生。工詩，後降於清。選詩持行世。卒於開封。
同時起兵者：

陳家麟，字恭夫，天興長樂人。諸生。聞沿海兵起，喜曰：「此吾致命之日也。」結義勇百人分隊出。家不及中資，盡所有佐軍。以無援死。

林夢龍，字言臣，永嘉人。崇禎十五年舉於鄉。官職方主事，行軍有紀律，累疏數千言。永曆三年，起兵福寧桐山死。事聞，王爲之不食。

陳世亨，瑞安人。歷鄧府審理、中書舍人。國亡入山。永曆元年十月六日，以六千人

復瑞安，援兵不至，見執，大罵不屈死。

十一月，桐山、尤山野攻平陽，兵潰，先後株連死者甚多。

林塗，字子野，福清人。崇禎十六年進士，授海寧知縣。之官，策一蹇驢，偕二童子、一老跛蒼頭，囊突操作，官署蕭然，門以內無胥役跡。洧任甫一月，北京陷，東南所在變起。邑賊李刀三以劍術惑衆，能緣壁走，伏水中一二日不出，聚黨千人，將揭竿。塗聞，故置不問，尋降牒云：「旦日縣官詣鄉約所講約。」至則數百人擁而噪，塗又故不置可否。講約方半，一卒縛刀三至，衆大驚，塗立杖殺之。從篋中出一紙曉通衢，以元兇既除，餘不問，一邑晏然，於是威名大震。

安宗立，塗寓書馬士英，言國難君仇，宜規圖中興，不報。數月，南京、杭州陷，卒乘亂乞餉，環署大噪。塗鎮攝之，亂乃定。塗以城孤不能存，引去。去之日，陳行李於庭，藥裹書籤外，絹素四端而已。闔邑民皆肖像以祀。

魯王監國，遷行人。黃道周、路振飛交章薦塗，因召對。區畫時務，大稱旨。道周督師，疏請塗偕行，遂轉戶部員外郎理餉，兼參戎政。時士英擁兵叩關，請入朝。塗具疏劾之，士英不敢入。已改御史，往諭浙西。行至處州，又以典銓非塗不可，召回，除文選郎中，

謝絕請託。時鄭芝龍恃推戴功，徧置私人。盜執祖制爭，芝龍衡之。會疏請召募福寧，斥私資得三千人。請復溫台，不許，以其兵屬他將。既而杉關失守，將從扈汀州，倉卒不能及。上殉社稷，大慟，散兵走山中，製棺，書「大明孤臣之柩」以待盡。

及魯王至長垣，福清義兵請盜爲主。盜別其父曰：「兒當死久矣。作令，城不守當死；扈駕，事不終當死；若再苟延，是以不令之名貽父母羞。」乃苴履負戈，雜徒旅中，與林汝翥、林師稷及御史蔡昌應、主事林泌、壯猷將軍鄧良藩、完義將軍某，聯六十社，合周鶴芝、周瑞、陳文達，以八月中旬，復福清、長樂、閩清、永福。盜與汝翥守福清，屯南浦。王擢左僉都御史，自將一軍，時所謂「忠武軍」也。九月十七日，清副將滿進忠兵至，衆潰城陷，盜身被數十創，猶血戰，矢貫喉間死。屍直立不仆。進忠拜之，乃仆。

子鍾爵、鍾哲。鍾爵，字思讓，去諸生。入山。鍾哲，有文名。盜從兄墳，亦工文。從弟懋勉，字伯奮，隆武二年舉天興鄉試，授福建道御史。盜死，王命領其衆，以隱遁終。子弼，博學，擅草書，亦終隱不出。

良藩，字如磐，武平人。鎮東衛百戶。崇禎末，遷江南營都司，調汀州，有清名。隆武中，擢總兵。福京亡，起兵扈王，挂征虜將軍印，封安福伯，晉侯。當盜之死，武進士薛允先同歿於陣。同春社總兵施三陽，偕弟中書舍人致和及薛五光、高枝聲，以援盜同日死，總兵

鄭士奇被執死，守備張士燦力戰死，舉人毛翼徵陣亡，妻陳經死。

士燦，福清人。武生。妻薛服毒死。

盜友人葉子器者，初在營掌記室，先爲清兵所執，使作書招盜。子器受紙筆，書絕命詞與之，亦被殺。

空葬福京井樓門外，友何晉卿附。晉卿故與空同起義，後佯狂遊江湖，沒身不返，其弟仁卿負骨葬之者也。

同空起義者：

郭文寬，字容甫，福清人。亦偕其族文祥應空，先空一月死於陣。子之楨，族人祚豐、文臺、名銑，邑人莊尚志、蔡薦侯、黃盛、盧坦然、陳仕功同殉焉。千總顧其龍得文寬冢歸，血漬幾滿。九月晦，餘軍復屯於蒼霞嶺，諸生張可均死之。

林之蕃，字孔碩，侯官人。宏衍子，空同年進士。授嘉興知縣，遷寧波推官，爲政清簡，以計罷歸。魯王起車駕主事。紹宗擢考功郎中，以浙江道御史巡按浙江，督餉聯絡嘉興軍。轉太僕少卿，齎敕存問錢士升、徐石麒。未行，昭宗即位，起故官。隱唐嶼，以畫自給。王攻福京，謀爲內應，事洩係獄，吞金屑死。

李士彥，字其迪，福清人。隆武二年廷試庶萃士。萬元吉駐忠誠，士彥以忠誠推官參

軍。城破，冒重圍出。王航海至，士彥糾衆曰「忠定社」，偕塗屯南浦。塗死，復糾餘衆，合施燠、方奇捷、謝鼎、樊翹、周庠屯蒼霞嶺。十月朔，拒戰水南敗。十一月十七日，戰觀音浦，退杞店龍田，衆潰。士彥啟王，自効無功。王念其勞，陞御史。後附阮進舟北行卒。

王來聘，福寧人。後復福清海口城，爲清兵所執，不屈死。

張寂惺，一名宋惺，會稽人。崇禎中爲僧，名石田。工詩，通內典，爲曹學佺、祁彪佳所重。威宗嘗召入，問成佛宗旨。曰：「陛下治世，自有帝王道法，佛教特臣等自善身耳。」上爲悚，重其言。半年辭歸。南京亡，號哭，糾合義兵秦望山，有衆三千，守小鹽。監國魯王舉爲將。清兵至。曰：「事急矣。」請南行，引兵迎扈，乃說鄭彩迎王。紹宗封護國禪師，賜紫衣金印。永曆元年，起兵應王連江，衆四萬人。命以兵部右侍郎總督恢剿軍務。郭天才敗後被執，所部皆散，遂隱琅琦白雲山，以詩寓感慨之思。

湯芬，字芳侯，海鹽人。雲章子。崇禎十六年進士。授山陽知縣。史可法、王永吉薦監紀推官，監劉澤清軍。遷戶部主事，督理杭嘉湖蘇嵩嘗鎮軍餉。陳洪範降清，招之不應。南京亡，雲章起兵平湖死，海鹽義師奉芬爲主。而參將周一誠持兩端，陽言起義，

陰款於清，心害芬，嗾義兵殺王有虔。澈浦義師以無餉譁，一誠門，一誠又嗾義兵追殺澈兵，釋清令陳之杰，督軍民薙髮。營兵義兵大譁，與澈人火其門，一誠走，韓萬象追斬之。黃泥橋，芬乃微服走謁福京。

紹宗於淮上夙識芬，及見歡甚，遷四川道御史。時鄭芝龍專政，芬於軍國利弊無不盡言，力請發海師直擣浙直，以是忤，屢欲中以危地。出使浙東，博錐入閩，見執嵩溪。張存仁以天時人事說之，將任官。芬抗聲乞死。

已得脫，間扈監國魯王，擢兵科給事中兼福興泉參政。及辛琅江，陞兵部右侍郎，總督義師。時水陸主兵者各自雄長。永曆二年五月二十五日，芬道寧德水滌，水師將章雲飛與秦川將黃際盛聞，芬說之息爭。雲飛裹甲復攻，際盛疑，執芬，緋衣大罵死。

周之夔，字章甫，閩縣人。崇禎四年進士，授蘇州推官。故有聲復社中，偶與張溥爭軍儲事不合，已調息爭矣，之夔復揭之於總督。衆論大譁，謂調停而陰揭之，奸險孰甚。尋坐事罷，疑溥爲之，恨甚。聞陸文聲許溥，亦伏闕言溥把持計典，已罷職實其所爲，因及復社恣橫狀。張國維言之夔去官，無與溥事，被旨譴責，溥幾危，久之始解。陸清源糾之，削籍，之夔憾不已。弘光時，阮大鍼修怨復社，之夔願效前驅。特旨雪前罪，起兵科給事中。

紹宗立，與趙最等五人膺考選，擢編修。徐孚遠自嵩江浮海入閩，上水師合戰議，請討虜自效。福京亡，率家丁拒守，衆寡不支走。張肯堂以之變熟海道，且起兵報國志甚銳，薦之監國魯王，晉兵部右侍郎，扼防三山。永曆二年二月，謀以福京納師，事洩死。

最，字我惟，餘姚人。崇禎十六年進士。授邵武推官、簡討，降清。

彭遇颺，字君萬，沂州人。父文炳，遵化遊擊。清兵至，戰死，贈都督同知，諡武節。

遇颺，崇禎十三年進士。好大言。安宗立，授職方主事，召對，改山西道御史。自任募兵，請用遼將招海兵，爲戰守備。出京，多携劣衿粟監，給劄同知、通判、推官、參將、守把，許召募，受賄不貲。尋巡按浙江，以家丁數百人括市錢。市人謁署門逐之，遇颺出兵擊殺七十餘人，幾激變。遇颺故黨馬士英，乃以邊才調江北。士英走杭州，潞王常澐命以僉都御史募兵兩浙。隆武元年，謁福京，仍起故官。路振飛力爭之，乃止。後降清爲興泉副使。

永曆二年正月，朱繼祚起兵，命王士王攻興化。遇颺間致書約開門納兵，繼祚未敢信。遇颺於三月八日令清兵出戰，置酒邀總兵張應元、參將路運暉、知府黎樹聲等共坐。酒半酣，從容言曰：「若猶念大明衣冠之盛乎？」衆曰：「毋言，族矣。」遇颺手起斬運暉。樹聲等鬪不勝，亦被殺，應元逸仙遊。諸坐上不知所爲，長跽唯命。於是登陴易幟，與知府胡允

貢、知縣盛于唐反正迎繼祚。紹宗擢廣東布政使，允貢爲馬將主餉。監國魯王留遇颺，除福建布政使。清使來招降，斬之。七月十二日城陷，與允貢、于唐被執至福京，不屈死，諡文莊。將王時華後死廣東。

允貢，大興人。歲貢。

于唐，遼東人。選貢。

王期昇，字麗青，宜興人。崇禎四年進士。歷工部主事，紹興、襄陽、長沙知府，南瑞副使。安宗立，遷職方郎中，請行稅契法。清兵逼揚州，吳适問防江守禦策。曰：「長江天塹，寧能飛越耶？」陞太僕少卿。南京亡，與吳景亶起兵西山。隆武元年七月，將路正、張德名、周六執於太湖陳母山，監紀通判張曾，遊擊方啟泰、任君易執於西洋大樹死。斯昇復長興，兵多不戢，四出劫掠。後謁福京，擢兵部右侍郎總督義師，亦以振飛言而止。入清，以義師牽連入獄卒。

景亶，字漆生，歸安人。祖某，舉於鄉，官僉事，南京亡，年八十餘，命景亶起兵。景亶，崇禎十三年進士。授新昌知縣。流寇縱橫，捐俸三千金修城。寇至，單騎招降其渠盧錦三。去任日，出千金完通賦。遷禮部主事、員外郎，請開館設局，修三朝實錄。杭州降，與金有鑑起兵復湖州，已軍西山。兵敗，被執嚼舌死。

郭符甲，字輔伯，晉江人。崇禎十六年進士。安宗立，授戶部四川司主事兼職方，督理南直兵餉。弘光元年五月，命偕譚貞良典廣東鄉試。未聞命而南京陷。方督餉至蘇州，已徵十三萬金，胥役請曰：「國無君矣，請充橐，且分給各避亂者。」符甲曰：「吾生不受一介，況此金者，國帑也。」悉還之原解州縣。紹宗即位，遷禮科給事中，冊封韓王於邵武，迎魯王於舟山。在垣三月，章三十餘上。自度不能容，引疾歸。

汀州變聞，歎曰：「吾散髮入山，早知有今日，然崖山航海，塊肉猶存，小樓三年，黃冠請歸，死吾分也，倘時猶有待，敢遽伏一劍以塞責乎！」

魯王次長垣，起兵科，監王祁軍。未行，適惠安、安溪、永春、德化、大田、尤溪兵起。永春右族周、李、顏、鄭等糾鄉壯迎符甲至梅溪爲帥。不旬日響應者萬餘人，分部五鎮，以林忠、顏昌儒、鄭英達、鄭岳、李錫燕、周天麟、蘇迪統之。復永春、德化，上遊聞風降附。聞昭宗立，命從子維城詣行在獻捷。王晉副都御史，提督義師，統制全閩招討軍務，便宜行事；忠等各副總兵。符甲承旨，益自激厲。

鄭成功攻泉州，營桃花山。符甲與沈佺期檄會攻，號召連絡惠安、安溪、永春、德化、延平、建寧、大田、尤溪各州縣爲犄角，衆至五六萬人。會成功走，清兵入泉州，各道兵多爲清騎所蹂。符甲師不動，數戰皆捷。但孤軍無援，清兵並力深入，昌儒、英達分守東關、太平

鎮者，皆敗。清兵趨永春，諸軍潰，符甲獨率親軍五百迎戰。身被數創，退守上場堡，絕粒不死。二年十一月十九日，因冠帶南向再拜，自經未絕。馬得功入，從小樓解其纆，以一扉舁之，拱手語曰：「先生何自苦！東南未盡平，願有相託。」符甲瞪目叱曰：「忠臣不事二君。子封任汝，報國繇吾。」唾其面大罵之。得功慚曰：「郭公志不奪。」命持刀就扉上斷其首。首懸杆上，面必南向。血流漬草盡枯，後其地無寸草焉。陳屍七日，顏色如生，蠅蟻不敢犯。夜中，聞空中人馬聲，火光起，得功乃俾其僕謝曉蒼備棺衾禮殯拜奠焉。曉蒼葬訖奔東寧。事聞，贈符甲兵部尚書。

子喬柱，任錦衣衛指揮僉事、監紀同知。先奉母入武榮山中，得免。後與維城依成功中左所。維城，太學生，任中書舍人，自有傳。

昌儒、英達、岳，於永春陷死，三百寨俱歿，德化亦陷，總兵鄭雲陣死。昌儒，兵部主事；英達總兵；岳，錫燕、天麟，總兵；迪，副總兵，皆永春人。

同時，諸葛斌，字士倫，晉江人。倬從子。隆武時爲監紀推官，從成功桃花山。清泉州西門守將楊義謀內應，有成約矣。而提督趙國祚召守東門，斌不知也。夜率衆臨城，與副總兵蔡參等全軍俱歿。

郭顯，晉江人。必昌子。亦以謀內應，事洩，一門十三人被殺。